

○歷朝憲章類誌卷之八

潘輝注著

△人物誌

●勳賢之輔

黎中興後三十九人

○黎中興 阮茂宜 雷陽盛美人功臣式國公阮汝賢之裔孫。駙馬興郡公阮漸之子。有文學器識才德兼備。中宗順平初效用爲鄭太師獎重參謀戎幕。累著功勳。英宗天祐中官吏部右侍郎。仁美伯。歷遷兵部左侍郎。祥麟伯。正治庚午太師薨。長子鄭檜構變。茂宜隨長興公左右。與諸臣感激結誓同心協濟。安內禦外籌畫居多。壬申論功進侯爵。世宗嘉泰初遷都御史。光興三年陞工部尚書。五年遷戶部尚書。十六年滅莫扈駕進京陞吏部尚書。封明義輔國功臣。時都城初復。衆務軫轍。茂宜當揆輔濟政理。就緒國家。倚以爲重。十七年齋勅追贈昭勳靖公。十八年會試天下舉人。命知貢舉。取阮實等六名入選。阮實後爲名宰相。簡拔得人。時議稱之。十九年加少傅。封瓊郡公。二十二年正月卒。

年八十二。茂宜以勳閥子而學問淹雅。操守淳篤。登仕四十餘年。竭心王室。臣節堅貞。履艱難。翊平定。茂建勳庸。晚掌鈞衡。以元老持政。儀軌百僚。爲中興名臣之冠云。贈少師。賜謚忠謹。

馮克寬 字弘夫。號毅齋。石室馮舍人。少時以文學重名。受業于永賴阮狀元之門。兼通術數。志氣豪邁。不肯應莫試。中宗初隨黎伯驪歸順清化鄉。試中首選。鄭太師一見獎其學識謀略。使參幕府。授御營記錄。知四衛軍。正治中奉差行各縣招集流民復業事回。遷兵科給事中。又遷禮部給事。以事忤旨。謫襄陽之河南城。忠憤所形。著爲國音辭曲自敍。卽世所傳國語記。漁父入桃源。有城南草屋花竹圖書之句。尋召還。世宗光

興三年初復會試科公以禮給事乞就試預中黃甲時年五十三陞都給事五年解官乞歸萬賴居第上許之六年復召爲鴻臚寺卿八年遷工部右侍郎尋轉清化承政使丁酉二十年以工部左侍郎奉使如明時明人受莫賄賂不肯納使克寬初候命遺書帥司極言莫氏篡竊罪狀明白黎之子孫叩關請命天朝扶莫抑黎是爲黨邪害正何以明大義於天下扶名教於萬世明人義之准令使臣進關克寬乃得入關既至燕禮部責以代身金人不遵俯形舊樣復止使不得進觀克寬抗言莫氏篡奪其名逆黎氏恢復其名順莫氏得以俯形代身已爲恩幸至如黎氏累世貢臣金人容仰成規具在今若以莫氏爲例何以招安勸而示懲創狀聞明帝卒從前黎之式克寬乃得入朝領印敕回國北人咸稱爲良使既歸成祖敬重之呼爲馮克生而不名國人咸稱爲狀元蓋欽羨其英能也在燕日值明帝萬壽節獻詩三十章明帝批云人才何地無之覽所獻詩具見克寬忠悃殊可嘉美又與朝鮮使李睟光賦詩揮筆立成睟光深服其才時年七十矣使回以功陞左侍郎梅嶺侯敬宗立進工部尚書三年進戶部尚書梅郡公癸丑十四年九月卒年八十六贈太傅爲人剛毅精明有綜練才詞章清裕有詩集行世

裴秉淵字拙夫清潭定功人昌澤之孫莫榜眼栎之子少時學問博洽文章贍麗鄉試中三場會丁憂不復應舉順平初時年三十同伯父柱舉宗歸順與岳丈黎伯驪入侍中宗時預贊戎機國事英宗正治中值內阻外証委曲周旋多有勳力榮封宣力功臣世宗光興十四年奉陪御駕復京城封純信功臣歷遷奉天府尹刑戶部侍郎十六年大駕東征奉留守西京時年七十餘尋陞禮部尚書制文曰朕惟北斗天之樞機所以斟酌元氣尚書王之喉舌所以出納王言眷惟耆宿之儒宜

黃光華之命宣力純信功臣特進金紫光祿大夫戶部左侍郎文峯侯裴秉淵冠簪閱閣詩禮門庭乃祖朝以文名家科第冠天下爾令公舉宗歸國忠義滿朝廷經營茂贊於四征終始勉殫於一節尹京斷衛擊豪強而贊兵謀參郡銘科宣聖化而持堂論率陳多歷年所篤棐至今日休寺卿六聯命令多其詳審使司二判方民賴以保全肆朕躬進取東京嘉國老圖完西土刑曹兩擢獄訟清平戶省載遷財用均節修治贊成於夏正陟陞宜進於春官公其清直一心典掌三禮惟平格益徵於天壽斯雲仍永匹於國休再加兼兵部尙書進爵文峯侯二十年明使來促會勘時初通好求封明三司受莫孽賄詰問眞僞公奉命往鎮南關對質反覆無所沮撓又進本國耆舊附戴舊主表文列名先小目鄭松次舊目黃廷愛次官目裴秉淵其擔當國事任重如此事竣回還加封功臣弘定五年八十五致仕尋起復奉侍國老十五年卒壽九十五贈少保謚恭懿性清介不營貲產死後家無餘財而福蔭流衍子孫興盛女侍王府爲昭容生四王子並公位男七人四侯三郡公一門貴盛爲南山望族之冠德隆初加封太保仙郡公遠孫裴璧登景興己丑科黃甲歷仕至吏部侍郎行參從丙午變後托目疾辭職晦于家

梁有慶 弘化會潮人榜眼得朋之子少時遵父遺命受業于永賴阮狀元頗精數學知黎氏當復中興決意向明而道路艱阻不能自達莫大正九年以家貧匱勉應舉試中第二卽不復庭試倍道潛行先達歸順表于安場府乞委差人遞接鄭世祖素聞其名遣兵迎之到神符海口公纔登舟莫兵已尾岸上矣既至府鄭王喜慰稱獎引入拜見中宗擢爲侍郎委以參贊機謀深加信任英宗正治中鄭王子檜構變莫兵入寇公隨長國公左右帝所與諸元臣感激指天爲誓日夜謀議獎勵軍士據險要增壘柵浚濠塹戰守具悉備賊分兵犯安場闕日夜攻逼益急公令軍士架數層壘撤

卷八 人物誌

勳賢之輔

五十

民屋壁板遮蔽。外塗泥土。上植竹尖。迨旦而假城成。延袤十餘里。砲臺銃門。處處碁列。賊將望見大驚引退。由是西都獲寧。是役也。內籌外禦。公之謀力多焉。文猷武略。一時推重。其後屢立大功。爲中興名臣。仕歷兵部尙書達郡公。子謙亨。少稱神童。光興戊戌科黃甲。仕終禮科給事。

黎擢秀 雷陽上谷人。祖贊善。叔贊襄。同登景統己未科進士。仕並尙書。爲宦譜美談。擢秀以世閥子孫。學有機杼。年四十四。登世宗嘉泰五年丁丑制科一甲出身。文章進用。爲成祖簡注。歷官都御史。文貞子。光興己亥。特加伯爵。敬宗順德初。有潘彥裴奎之變。駕回西京。人情騷動。擢秀左右扈蹕。追隨規畫。勳績居多。逮旋軫論功。追封協謀佐理功臣。陞吏部尙書。爵文賜侯。旣登揆。推引賢才。振整法度。數犯顏諫爭。風概挺特。性廉直方潔。不營貨利。持政十年。旣罷。相家無餘財。清介之節。時人美之。卒贈少保郡公爵。加封福神。

阮文偕 天祿芙蓉人。年二十七。登世宗光興三年庚戌科會元。殿試賜第二甲進士庭元。初官清化憲察使。成祖夢神人誦詩有天祿指揮之句。遂命參錄軍事。籌畫居多。是時擒僞莫復故都。公預有大功焉。戊申年官都御史。時初通好于明。以應接北使爲重命。公與尙書杜汪往南關候命。車駕隨發京師。進闈會勘。明人愆期。帝還京。次年春。復遣赴候闈。上夏車駕臨諒城過關。與明人相見。成禮而還。歷陞參從吏部尙書掌六部事。兼都御史。少保澧郡公。永祚癸亥。鄭椿之變。公密贊軍機底寧國本。以扈從進發之功。進少尉。加翊運贊治功臣。尋進封太保。公歷三朝。居官四紀。勳庸權位。超冠當時。戊辰年七十五卒。贈大司徒。賜謚謹度。

吳致和 東城里齋社人。年二十八與父致知同登光興十五年壬辰科進士。初官山西憲察使。密蒙成祖知遇。未幾召爲吏科都給事。陪侍府堂。擢刑部右侍郎。出爲清化鎮紀錄。弘定甲辰召回。進吏部侍郎。賜爵富祿伯。丙午奉正使如明歲貢。戊申冬以使功進戶部尙書。尋命兼國子監祭酒。庚戌年進爵富春侯。戊午冬啓陳六事一乞修德政以祈天命。二乞抑權豪以養民力。三乞禁煩苛以厚民生。四乞抑奢侈以豐民財。五乞禁盜窃以奠民居。六乞修軍政以護民生。哲王皆嘉納之。永祚癸亥逆椿煽亂。羣盜多起。神宗還京後。命爲督視同統領鄭松略定山西。回加少保。封協謀佐理翊運贊治功臣。乙丑年六十二卒。贈春郡公。致和學問優長。綽有政術。敇歷內外。左右攸宜。勳望顯著。爲三朝名臣。父子同科。家門衍慶。尤爲古今曠見。致知仕至監察御史。累陞禮部左侍郎。壽九十二。贈太保。衍慶伯。子仕榮登真宗福泰丙戌科進士。歷仕光祿卿。理清侯。封敦厚佐治功臣。三世繼登科甲。爲父安晝香倡始。玄孫公耀。興教同登科進士。

按黎中興初賢才輩出。德器勳望之優者。阮盛美公爲首。至如閻歸順。險難出奇。據才猷以經緯。而卒無負於初志。馮裴梁諸賢事業均稱彪炳。若黎阮吳三公。則由科舉進達。繼登樞軸。公清忠亮。總之無愧名臣。此皆未滅莫前。登用故特錄爲先著。自阮鄖內公以下。則中興後所得。仍次第列于左云。又按當時有自莫臣効順歷登台輔者。前後三人。其聞望事業亦皆有名于世。附錄之以備參考。

阮傳 青威耕穫人。年三十八。登莫大正三年壬辰科狀元。歷仕至吏部尙書。郡公。中宗順平二年。福源攻其大將黎伯驥。傳與伯驥通家。乃同謀遣使奉表歸順。既至。帝仍其職爵。命掌銓衡。當政凡一年。英宗天祐秋卒。年六十二。傳子倦復反歸莫。福源妻以宗女。使發

兵拒王師。累獲勝捷。後封常

國公。爲辰名將。莫滅。復被擒。

卷八 人物誌

動實之輔

卷八 人物誌

勳賢之輔

五二

阮挺

慈廉黃舍人。莫廣和初年。辛丑科同進士。詣清化歸順。仕至吏部尚書。興禮侯。中興籌策贊畫居多。庚午鄭榆之變。隨長興公左右。帥諸臣指天爲誓。同心討賊。復加封竭節宣力功臣。少保慈郡公。卒贈太宰。

杜汪

嘉福段林人。年三十四。登莫光寶丙辰榜眼。仕至吏部尚書。東閣大學士。福郡公。莫亡。率諸文臣詣軍門歸順。上許仍其職爵。改通郡公。兩度奉使。往南關候明使。冊封完禮。酬應咸中蘇會。歷加少保。慎德初有水軍之變。駕回臨東。汪諫請留京。爲亂兵所殺。後贈

太保。封福神。段

林有廟祀在。

阮名世 彰德鄖內人。年二十四。一舉登科。光興十八年。乙未科同進士。慎德初官翰林校討。丁

憂家居時。鄭成祖奉帝駕回西都。圻甸空虛。莫孽復聚。迎茂治母裴氏至京。稱制詔舊官悉行封拜。名世隱避不受僞命。及賊平。朝廷獎之。擢山西憲察尋召。爲戶科都給事。陪從府堂未幾。遷太僕卿。丙午春。奉副使致貢于明。回陞戶部右侍郎。子爵。己酉春。總視鄭松軍。討莫敬恭于太原。不見敵而還。丙辰春。進官戶部左堂。戊午冬。遷都御史。永祚辛酉。復命爲督視。叶副將。鎮涼山地面。是年冬。進討敬寬於高平。以清郡公爲總鎮。命名世爲督視。進攻賊壘。拔之。癸亥。鄭椿作亂。與王世子清郡公定謀。奉帝回鑾。以固根本。隨奉協督水步諸軍。進破賊衆。東京底清。以功陞工部尚書。封翊運贊治功臣。瑞陽侯。甲子冬。又命督視鄭棣軍。由太原道。進攻高平。乙丑錄功。加少保。丙寅春。遷少傅刑部尚書。勘理天下詞訟。其後議征順化。命與太保阮啓率將士先往奇華。規料邊事。次年夏。帝親征。駕至日麗。南將拒守。命名世爲書諭之。仍班師。是冬。兼都御史。德隆己巳。進爵堂郡公。壬申春。拜參從。預贊國政。尋加太保。陽和戊寅。復命節制崇國公征高平。仍以名世參贊軍謀。庚寅春。加掌東閣知世操守方剛。達政體。練兵務。數歷內外。凡五十年。爲時能臣。贈太傅戶部尚書。加左司空。謚文忠。經筵事。兼禮部尚書。癸未春。車駕三往順化。命名世留守京師。鎮守各處。福泰乙酉年。七十三卒。名

阮實 東岸雲恬人。號節齋。字樸甫。年四十一。登光興十八年乙未科二甲進士。庭元初官戶科都給事。辛丑遷鴻臚寺卿。丙午奉副使如明歲貢回陞禮部左侍郎。子爵尋遷爵芳蘭侯。丁巳冬陞刑部尙書。永祚丁卯進秩少傅。秩奉往候。命迎使臣回國錄功封公爵。蘭郡公德隆。辛未陞少尉。次年加國老。參預朝政。陞太保。甲戌秋年八十陞太傅。戶部尙書致仕。中興以來以尙書致仕自公始。陽和乙丑年卒。年八十三。贈太宰。賜謚忠純公。純厚清謹不事防畛。履歷華要而家門清白。有古名臣之風。子宜繼科首揆。有傳見後。
曾孫阮圭。阮仕並。登景治庚戌科同進士。七代孫阮賞。

登景興甲戌科同進士。繼世科目爲北江望族之冠。

阮惟時 安朗安朗人。年二十七。登光興二十七年戊戌科二甲進士。弘定丙午官給事中。奉副使致貢于明。回陞僉都御史。芳泉伯。時災異迭見。啓言民者國之本。治國之道愛民而已。天與民一理。民心悅則天意得矣。是以善爲國者愛民如父母。愛子聞其饑寒爲之憂。見其勞苦爲之恤。禁其苛暴。止其擅賦。使民得遂其養而無愁恨歎息之聲。此所謂知治國之道。今聖上有意於民。一政之施務在養民。一令之行深戒擾民。其愛民之心。眞天地父母之爲量者。第奉行者未能仰體德意。務行苛虐。競爲奢侈。該一縣則困一縣之民。擾濫之事無所不爲。使天下之民男或無衣女或無裳。歌唱之席不復置。婚姻之禮不復備。養生送死無所資。飲食日用無所給。貧弱氓隸。昆蟲草木俱不得遂其生。是以感動天地。致天心未順。洪水之災泛溢。不常得非時政所闕。其可不恐懼省修思所以致此之咎乎。必能行保民之政。則上順天心。下悅民意。而轉災爲祥。年穀屢登。家人給足。海內昇平。國家億萬年之業。今以後其有永矣。哲王嘉納之。丙辰遷副都御史。尋陞禮部左侍郎。己未間鄭椿變作事連內殿。哲王集百官議。惟時與阮名世黎弼四請倣伊霍故事。神宗立遷吏部左侍郎。侯爵。

永祚癸亥以扈從進發二功。封翊運贊治功臣。丙寅春陞工部尙書。時年五十五。尋遷爵泉郡公。加少傅。陽和壬午遷兵部尙書。累加參從吏部尙書掌六部事兼國子祭酒。加翰林院進太傅。開秉鈞府。爲時倚重。幾三十年壽八十一。贈太宰公。初爲庠生時夢神人誦詩云。安朗安朗人安危係此身。後果貴盛云。

黎弼四 農貢古定人。年三十六。登光興二十年戊戌科二甲進士。弘定初賜爵衍嘉侯。丙午年奉正使如明謝封。戊申夏使回。以功授戶部左侍郎。戊戌春啓陳二條。其一請定世子預付兵權。以固民心。其二請處置強藩。以一制度略曰。王者以天下爲一家。臥榻之側。豈容他人鼾睡。茲太原高平等處。本是先朝境土。曠年積弊。任彼自爾強梁。若不處置。恐爲他日之患。今聖上濟英雄之志。百戰百克。以有天下。將佐雲集。士勇技精。飲馬則河水乾。磨劍則山石缺。戰船千艘。雄象百數。天下精兵悉聚京師。而縱敵不擊。此所謂養虎遺患也。昔唐憲宗從黃裳之請。以法度裁制藩鎮。卒成中興之功。由唐以來。豈無藩鎮專地專兵。但朝廷之法度既立。彼自不敢肆耳。今強藩專鎮。其勢已成。所宜早圖抑制。可不効忠言以啓之。恭乞裁斷行之。國家億萬年無疆之業。其在於此時。哲王重於用兵。雖嘉其言。而未暇行。乙卯王命選補軍伍。時災異數見。弼四與劉廷質啓言。天心仁愛必形於譴告之中。本年五六月間農務正殷。天旣作旱魃。耕民失望。茲八月禾穀方成。天又降災旱。遠被郡國。一年之間災異屢見。閭里之民多有嗟怨。得非時政之闕使之然歟。茲令催清化處各縣社逐項選益另兵。恐非閱選之時。茲令一行。其諸權勢所該。隨而效之。更以選補民命。將何以堪。恭乞以敬天恤民爲心。酌停益兵施行。如此則人心悅。天意得。和氣致祥。甘露降。嘉禾興。黎民陶給足之休。國

勢奠泰磐之壯。而祚胤永無窮矣。戊午又啓陳六事。一乞修德政。以祈天命。二乞抑權豪。以養民力。三乞禁煩苛。以厚民生。四乞抑奢侈。以豐民財。五乞禁盜刦。以奠民居。六乞修軍政。以護民生。王皆嘉納之。神宗立遷陞兵部尙書。時年五十八。尋命入參從。歷加少傅。丁卯年冬。大十五卒。贈太保。衍郡公。賜謚和義。

劉廷質 弘化葵渚人。功臣林郡公劉廷賞之子。已官吏科給事中。年四十二。登敬宗弘定八年丁未科二甲進士第。元陞都給事中。癸丑官寺卿。仁嶺伯。奉正使如明歲貢。回陞吏部左侍郎。侯爵乙卯以災異數見。與黎弼四啓陳事宜。戊午冬又進修德弭災啓。云竊聞天降災祥在德與否。作善則降之以祥。不善則警之以異。而修德則無損。是以古人以天自處。而致謹於天命之降。漢文帝克承天心。而變異消弭。宋景公一發善言。而災星退舍。國家自恢復以來。天地未應美祥。未至而災異疊出。本年秋候。天雨異炭。而當時諱言灾異。指爲雨米。豈至和如史皇之世。而天爲雨粟者乎。天雨黃沙。而術士好言祥瑞。指爲雨金。豈亨通如夏禹之世。而天爲雨金者乎。意者既示之警。或未省悟。九月下旬。越本月初。異星見于東南方。見者無不駭慄。尤非小異也。德之未修。政猶缺失。而致然歟。今政事所行。不逮往年。命令之示諸將。不體上人寬恤之意。務行苛政。竭民財產。愁苦之聲。足以感動上天。而天警以怪異。人主覩是。宜以自警也。恭願謹祗天戒。惠養小民。凡一毫有便於民者。行之。一弊有妨於民者。去之。尤且施仁政於民。京城庸坊之民。所當恤也。則號令諸將。禁戢攘奪。清化四政之民。所當恤也。則申勅諸將。勿爲煩擾。如此近者。被其澤而悅。遠者聞其風而來。斯得民矣。人心悅於下。天道應於上。將見災星轉爲景星。沴雨轉爲甘雨。諸福之物。無不畢至。而王道大成矣。永祚

初遷陞戶部左侍郎。癸亥夏鄭椿構變。王室搖動。廷質奉事靖王贊畫追隨。迄靖其難。以功擢都御史。尋封佐理功臣。命入參從進戶部尙書。少保福郡公。丁卯卒。年六十二。贈少師。

阮宜 東岸雲恬人。阮實之子。年二十二。登敬宗弘定二十年己未科同進士。德隆庚午。奉副使致貢于明。福泰乙酉陞禮部尙書。加少保。楊郡公。尋命知經筵事。兼東閣大學士。國子監祭酒。盛德癸巳。進吏部尙書。加少傅。尋命入參從丁酉。年七十卒。贈太傅。賜謚恭懿。宜與父實同時簽用。居官醇謹。尙清約。不立產業。名德碩望。時人所敬仰云。

楊致澤 天祿拔擢人。年三十四。登弘定二十年己未科同進士。德隆庚午致貢于明。奉充正使。回陞陪從。福泰甲申命爲督視。與王子西郡公進討莫孽于高平。俘其僞黨。盛德初。歷進禮部尙書。兼翰林院侍讀。參掌院事。封翊運佐理功臣。拔郡公。時年六十八。初中興自順平制科至慶德壬辰二十五年科。未有題名碑。至是公奉旨刊次勒碑。乞竣盛典。尋命入參從進戶部尙書。加少保。永壽辛丑年七十六。乞致仕。陞吏部尙書。加國老。太保。登朝四十餘年。歟歷仕途。久居樞院。性剛直執法。無所假借。持論涉刻。而循公守正。時稱名臣。歸老歲餘卒。壽七十七。贈太宰。

鄧世科 彰德良舍人。義國公鄧訓次子。有文學智略。爲文祖簡注。初以世胄擢武階。德隆初。封廉郡公。福泰甲申命兼鎮山西山南二處。乙酉進討太原莫寇。大破之。加左都督。丁亥改授戶部左侍郎。陪從參議事務。盛德初。府僚諸員俱被賄賂訟。廷臣降貶。惟世科獨無所浼。鄭王深嘉獎歎。陞兵部尙書。入侍參從。與阮實致澤並相持政四年。守法循公。無所阿徇。丙申二月卒。年六十四。世科以勳閥子而學識該洽。律身清約。門無一毫闕節。時議稱之。贈少保。加封福神。

范公著 唐豪遼川人。父爲儒生。有厚德。得神賜貴地。遂抒先墳葬之。公著年長。家貧。將之他方。夢神告曰。公當晚成。因感悟力學。年二十七。登神宗永祚戊辰科同進士。初官太常寺卿。陽和壬午擢山西道贊理。與鎮官專閫務。福泰初。入爲副都御史。加伯爵。尋陞都御史。盛德丁酉陞禮部尚書。燕郡公加少保。兼東閣大學士。萬慶壬寅監守國子監修殿堂砌牆宇。以朔望肆諸生作泮水堂於前湖中。延客賦詠。文風振起。士習一新。景治初。進吏部尚書。參從爲陽王信任。無言不從。布教條明。課法旌孝弟。褒節義。校丁田定稅例。制度規模。煥然咸備。戊申年六十九。乞致仕。上慰諭勸留。懇請再四方許之。陞太保。加國老。參預朝政。御賜彩旗聯云。調鼎鼐燮陰陽。朝廷柱石完。規模定。號令國家棟樑。又云。尙書掌印六垂紳搢笏九廟奠安天下。達尊三緯績嘉言。朝廷專望語。極其獎重。公著留簡朝臣。和其詩者。五府六部六寺科道翰閣五十餘人。書于縑帛。飲餞江亭。遂爲後來定例。陽德癸未起復。掌六部事。參贊機務。德隆乙酉卒。年七十六。贈太宰。謚經濟。爲人深沉簡重。當國十九年。建明法度。振舉紀綱。裁抑倖濫。敦尙風節。辰稱名相。嗜書好學。至老不倦。德望勳業。爲中興後賢。宰第一云。子公芳。登永治庚寅科進士。仕終給事。

陳登選 安勇黃梅人。年二十七。登神宗陽和六年庚寅科同進士。改名登進。盛德丁酉命將南征。特準督視富郡公鄭根軍。仍遣爲協同參贊軍務。永壽辛丑論治平功。由兵部右侍郎陞都御史。子爵弘祖。以其久參戎幕。特賜爵川郡公。命入陪從。景治甲寅置六部正官。陞禮部尚書。未幾考刷事過。貶本部右侍郎。乙酉夏。進兵部尚書。與禮部尚書芳郡公武惟志並加參從宰相。時年五十七。陽德癸丑年六十卒。爲人沉毅端正。學識該博。南征之舉。籌畫居多。居官恬靜。不抗不隨。贈戶部尚

書少保謚雅量。

卷八 人物誌 勳賢之輔

五八

武惟志 唐安慕澤人。母有陰德。還人遺絹事。人稱其賢。生五子。二登科甲。

其二拔萃甲戌科黃甲。其五永諸己亥科進士。

爲功臣。其一自快爲陽王潛邸舊臣。官至侍郎功臣。其四方丈官至尚書。封功臣。郡爵。

惟志其第三子也。有文學。達於吏事。爲人慎密。有心機。侍陽王

潛邸日久。頗見親幸。時南禦順化。西討高平。惟志皆追隨羈勒。或駕海調糧。或登山督戰。茂著勳伐。以故寵遇日隆。景治中。進擢禮部尚書。芳郡公已酉與陳登選並加入侍參從入相時。朝廷有以吏道爲言者。陽王聞之。卽歷叙蕭曹房杜爲解疑論以示下。其見信任如此。惟志性重厚質直。守正不阿。會新春正旦。王府旨傳兩班殿朝禮訖。各仍品服。詣府拜賀。公卽啓云。王家從來一念尊扶帝室。今日之禮。宜循青吉衣。不宜遽用朝服。恐違舊制。事爲中止。能言人之所不敢言。蓋有古爭臣之風矣。永治丙辰年七十三致仕。加陞吏部尚書。國老太傅。御賜彩旗云。一代尊臣蕭相國。兩朝元老趙韓王。戊午年七十五卒。贈太傅。

子弼諱。永壽乙亥

科進士。父子同朝。

按自弘定至于陽和。盛德間。內修外攘。朝廷多事。當辰登揆席者。德望才智往往多得名臣。如鄖內安朗二公。練達英毅。勳業著聞。卓然爲時稱首。古定葵渚。則嘉猷建白。裨益弘多。若阮雲恬之清醇。坐鎮雅俗。楊拔擢之剛直。持正風裁。鄧良舍之公廉不通關節。所尙總各有長。蓋六十餘年之閒。相繼秉樞。同心輔佐。所以清內難寧。外防而翊皇王之治者。厥功亦云偉矣。迄于景治。陽德年間。則天下治安。制作維持。范遼舍公出而振整。恢張法度。修舉功名。顯著其貞相業之大成歟。至如陳武二公。皆以戎功入相。而入朝矩度。亦有可觀。故並以登載云。

阮茂材 嘉林金山人。年三十一。登真宗福泰丙戌科進士。陽德官都御史。安嶺男。奉正使如清

歲貢回陞刑部尙書子爵再陞兵部尙書。永治丙辰命與工部尙書胡士楊入參從尋進禮部尙書。首揆六期亦無大過。正和戊戌秋爲清化參從。阮曰當啓劾罷相降戶部左侍郎。乙丑年擢工部尙書。未幾再命入參從加爵安嶺伯。時年七十乞謝事昭祖欲以耆碩鎮雅俗眷留不許。戊辰七十三復請致仕未及歸而卒。贈禮部尙書少保。茂材清醇重厚與人未嘗有怨。時以德量推之。弟茂善登正和科同進士官

至副都陪從。子惟坦登正和甲戌科同進士。仕至僉都御史。孫謙益有傳見後。

同存澤至靈慶陽人。伯祖同沆才學名世。登莫光寶進士。仕至尙書效順。祖同得亦繼登科。存澤學問得諸家門機杼。年三十一舉登真宗福泰四年丙戌科同進士。應制第一。初官都給事。景治甲辰陞戶部左侍郎。子爵己巳遷工部左侍郎。乙酉擢都御史。尋坐罷。陽德癸丑起用爲刑部右侍郎。永治癸亥以戶部尙書入參從爵義澤侯。辛未年七十五致仕。存澤起廢復用。風彩益峻。持政九年家無餘蓄。人稱其清謝。事一年卒。贈吏部尙書太保義郡公。

阮曰庶丹鳳山桐人。年二十七登玄宗景治二年甲辰科二甲進士。庭元應制合格。永治丙辰官陪從吏科都給事中。預中東閣第二。擢東閣校書。正和辛未年四十八陞刑部尙書爵枚山男。尋命入參從次年卒。贈吏部尙書子爵執政日久持法無私好。進引人物爲時名臣。

阮冠儒瑞原挽河人。年三十登玄宗景治五年丁未科同進士。正和甲子擢副都御史。辛未春進吏部左侍郎。壬申冬加都御史。次年陞兵部尙書。尋命與刑部尙書黎禧同入參從。時年五十六首揆五期性簡易不事藏匿。丙子秋考內外官康王召擬題戒以漏泄公偶與人言語不覺微露。有內豎以聞。王怒甚免相降本部左侍郎。翊日都御史阮貴德坐事左遷改命公爲之蒞臺七年壬

午秋復原職再入首相。歷加禮部尚書。知中書監。香江伯公與石溪黎公同時登揆。黎公性忌刻。而公務持大體。事從寬厚。天下賴之。時人爲之謠曰。尚書黎禧。天下愁悲。宰相挽河。天下謳歌。永盛丁亥年七十致仕歸閒一年餘卒。贈吏部尚書郡公爵。

鄧廷相 彰德良舍人。中興功臣鄧訓之玄孫。武臣燕郡公柳之子。卿試解元。年二十二一舉登玄宗景治八年庚戌科同進士。以勳閥登朝。渥蒙眷注。正和丁丑奉副使致貢于清。所至吟詠有祝翁奉使詩集行世。乙酉年官陪從。吏部左侍郎。男爵康王。以其知兵事。改武階都督職。出鎮山南。賜爵郡公。累進西軍都督府左都督署府事。加少傅。封佐理功臣。開前和軍營。永盛戊戌。加太傅。參預朝政。國老致仕。御賜詩云。璞玉渾金嶽降神。出爲牙距入攀鱗。躬提忠信穹天爵。國茂勳猷偉世臣。窮髮愕瞻司馬。相東郊乍整薛平巾。五湖更是高人志。想望猶懸四海民。庚戌夏推恩臣僚仁王。以有功講幄。特準陞次。加五老。尋起復命掌府事。時順王初立爲嗣。公進述古規訓八篇。且條警勉之意。請王以賜世子。王優獎之。累頒衣被几杖。及粟帛田祿。仍命時入視事公府宮廚。賜食。年八十。加大司馬。再致仕。龍德乙卯年八十七卒。贈大司徒。封福神公。青年登仕。蹈履高華。幾七十載。爲累朝耆舊。勳名品望傑出羣僚。三子一孫皆尚郡主。家門貴盛。人號爲國老僊。

阮貴德 慈廉天姥人。中士望選。年二十九。登熙宗永治元年丙辰科一甲進士第二名。庭元。正和庚午春。奉正使如清歲貢。甲戌秋。進禮部左侍郎。入陪政府。爵廉堂伯。次年冬。陞都御史。丙子秋。以斷訟失當。貶兵部左侍郎。仍陪從。戊寅年遷吏部左侍郎。永順戊子陞兵部尚書。參從進爵廉郡公。加封佐理功臣。兼東閣大學士。時年六十一。既登揆。禁煩苛。寬通欠省役恤農民。賴其澤。辛卯春。

安王初立。議定廟制。王以康王曾孫繼嗣。追封祖考國宰公爲良顏王。考參宰公爲晉光王。時議有以當別爲立廟者。公言三位皆長嫡。正宗厚德。垂裕萬世。惟王入正宮廟。於理爲順。因陳別廟。有可疑者五。王從之。議乃定。甲午推恩。與鄧廷相俱。煙少傅。丁酉年七十一。乞致仕。章再上。上猶眷留不許。復啓固請。有云。雖朝廷有道。固無公孫側目之譏。然仕宦成名。願思老子知足之戒。辭意懇切。始許之。加太傅國老。參預政事。賜御詩及車田祿。寵愛甚渥。歸閒後。優游桑梓。於江邊築樂壽亭。以寄玩。溪林瀟洒。追慕香山洛社之遊。與鄧國公往來。唱酬爲樂。有掉泛寧江飛姥野之句。高情逸意。一時歆羨。庚子夏卒。公爲人寬厚沉靜。居常酬接。恂恂樂易。及上前議論。事有未允。堅執數四。確然不可奪。爲文不事雕刻。而意思精密。朝廷有大制作。多出其手。首揆十年。爲政務在寬厚。後進多所推引。潤飭學宮。豎立科碑。皆躬身綜理。迄完美典。議者多之贈太宰。追封大王。子貴恩登永盛乙未科黃甲。爲順宗司講。後追封大王。長孫貴懿以鄉貢進朝。官至參從。有傳見後。

黎英俊 號迪軒。先豐青梅人。少以文章有重名。年二十四。登熙宗正和十五年甲戌科同進士。永盛乙未致貢。十清奉充正使。歷戶部左侍郎。入陪政府。戊戌夏。加入侍經筵。爵甸城男。庚子考文武十年。課績預上考。特陞刑部尙書。賜爵甸郡公。尋命與阮公沆。阮公基同入參從。年五十一。時仁王勵治。公與公沆多所建明。法度號爲詳備。保泰丙午。加少保兼東閣大學士。永慶庚戌。順王立。推恩。進戶部尙書。加太子太保。壬子冬。出爲諒山太原督鎮。公久當揆路。晚頗招權。順王久不悅。會有譖。其初與阮公沆謀易王儲者。王遂加疑忌。甲寅年。貶諒山承正使。丙辰年。賜死。時年六十六。性沉

卷八 人物誌

勳賞之輔

六二

密嚴重蚤以盛名登朝當揆經畫勳績可記卒以疑似獲罪中外憫之景興辛酉恩王既立准復原官贈太保謚達毅

阮公沆 字太清 號靜齋 東岸扶軫人年二十一由儒生一舉登熙宗正和庚辰科同進士爲本科少雋永盛辛卯官提刑以直言預賞銀帛遂日蒙知遇尋擢僉都御史乙未冬命爲高平督鎮高平素要官仁王欲以祿之公不願行王固令諭旨始受命入謝賜便宜行事丁酉召還陞兵部左侍郎命入陪從次年夏奉正使如清告章皇哀兼求封乙亥秋使還庚子年考文武課績預上考陞尚書年四十二再推恩賜爵朔郡公命與果郡公基甸郡公黎英俊並入參從時仁王銳志圖治公沆既秉樞機展盡底蘊建白爲多當辰兵民財賦之政創置號爲詳備王深所信用常於五更命中使宣召公與黎公入閣議事時睡皆未起王坐以待之既至笑謂曰逼來警醒自古有此不皆拜謝仍命坐賜茶從容咨訪日晏始出其親款如此保泰乙巳命兼都御史再命爲王世子保傅賜開中銳軍營丙午春加少保丁未冬仁王建古碑行宮宮成推恩陞少傅因辭兼臺長暇時輒遊意經學率諸文官入國子監習八股經義嘗欲不變文體振動士風永慶初順王嗣政推恩進吏部尙書加太子太傅龍德壬子加太保賜號佐理功臣時年五十三是年冬順王以陰謗貶爲宣光承政使尋賜自盡公沆有公輔才器自以得君知遇毅然爲國當事首揆十三年經畫建置燦然可觀惟果於自用忌之者衆構成朋黨卒及於難景興初准復原官爵始賜歸葬有星槎詩集行世

阮公基 慈廉明蚤人年二十三登熙宗正和丁丑科同進士少雋初官翰林校討甲申以告鄭

掄拔等謀反事擢爲工部右侍郎永盛乙未奉正使如清歲貢丙申使回歷兵部尙書庚子年考文

武官十年課績。預上考。推恩賜爵果郡公。仍命與阮公沆、黎英俊並人參從。時年四十六。在政府。直言數爲所抑。遂請改武階。歷加少保。丁未夏。命署府事。龍德癸丑年五十九卒。雖貴不立產業。有清貧名。贈少傅。

阮倣 農貢蘭溪人。年二十二。登熙宗正和二十年庚戌科會元。庭賜同進士。永盛乙未命入陪從。獻治平策。仁王嘉其忠。以爲可大用。遂日蒙眷注。丁酉冬。王子順王初出閣。以爲左司講。歷遷左侍郎。庚子夏。推恩陞侯爵。永盛壬寅。考策上課。特賜爵農郡公。丙午命往清化發帑錢賑貧十四萬。丁未秋。擢都御史。仍陪從。永慶庚戌。順王親政。以講官進兵部尚書。加少保。賜開中捷軍營。再遷禮部尚書。知翰林院事。龍德庚子秋。推恩加少保。封左理功臣。尋入參從。時順王猜忌羣臣。果於誅譴公爲相。以仁恕取忤。遂坐免。降刑部尚書。少保未幾。推恩授吏部尚書。仍參從。乙卯年六十二卒。爲人重厚端靜。以方正自持。培植士類。引接後進。自一命皆以禮接。晚秉大政。思矯苛切之弊。平賦役。弛征榷。百姓賴之。贈太保。累贈大司徒。加福神。子阮侃。景興四年癸亥會元進士。仕歷吏部尚書。參從阮郡公。鼎革後卒。壽八十。

阮謙益 號敬齋。嘉林金山人。阮茂材之孫。姑夫寶篆進士范公善養。以爲子。遂改姓范。鄉舉解元。年三十二。登裕宗永盛六年庚寅科探花。庭元庚子年。官刑部左侍郎。擢吏部右侍郎。賜爵述芳侯。命入陪從。保泰癸卯。奉正使如清賀。登極既抵燕。以日月合璧。五星連珠。與全部獻詩三章。清帝嘉之。硃批褒美。召見於乾清宮。慰問備至。及回。准陞左侍郎。述郡公。仍陪政府。遷吏部左侍郎。戊申年。御試東閣大有年歌。極蒙稱賞。其辭曰。臣竊惟豐年上瑞。自古罕逢。自非聖德召和。曷見休徵。滋至欽惟。皇帝陛下稟乾健中正之資。撫泰亨昇平之會。庶徵陽應。比歲豐登。垂髫騰里巷之謠。戴

卷八 人物誌

勳賈之輔

六四

白溢康衢之詠。爾乃體勅天之美意。想屢豐之遺音。爰命百工式歌九叙。臣祇奉綸音。舞蹈形庭。謹稽首拜手而獻歌曰。天難谌。上監臨。惟明憲。享天心。琴張網結。敷仁政。雨施雲行。布德音。仁政如天。無不覆。德音戶曉。隨家喻。春秋補助樂。三農田土等差均。九賦咸蘇。處處遂方方。融怡和氣兆嘉祥。陽愆陰伏時。那忒雨順風調福降。康夏播來。牟秋稻稷。四野禾麻爭茂。或高原萬頃正芃芃。下濕千畦。皆翼翼甌窩滿。籌邪滿車千。倉萬箱盈室家。定知樂歲終身飽。始信豐年麥黍多。慶溢闔閭歡老稚。顛流散歸鄉里。宅安鴻鴈息哀鳴。野詠鳬鶩歌既醉。人興禮義俗回淳。舟車所至舉尊親世陶。噩噩躋軒昊。德藹巍巍配放勳。小臣忝連鴛鷺序。快覩鳳儀觀舞獸。自慚藻思乏韓歐。擬作燕辭歌。舜禹歌有年。詠有年。光垂信史照瑤編。敢希周宰嘉禾頌。擬效劉生瑞麥篇。預中第一加兼東閣大學士。永慶初陞都御史。行吏部事。龍德壬子進兵部尙書。加少保。命入參從。時年五十四。尋解任。推恩遷禮部尙書。仍入參從。時順王疑忌。又廣營宮室。民浸弗堪。永祐丙辰公進審治一覽書。王賞以銀綬。因賜號阿保佐理功臣。陞吏部尙書。丙午秋免相。己未年出爲清化督撫。歷進太宰。庚申年。六十二卒于鎮。贈大司空。賜號醇道公。文章德行爲時模楷。使燕增重國體。人比之馮克寬。執政務崇寬大。晚爲羣小所擯。不獲究于用。朝野惜之。

按永治正和間。上下安平。中外無事。執政柄者大抵以雍容爲德度。持重爲體統。如金山。挽河天。姥諸公。皆以寬厚稱職。所謂治世之良臣也。至于永盛。保泰。仁王。銳治。當時扶軫青梅二公。建白創置。王度修明。固皆無忝相位。但更改之餘。人情未遂。蘭溪。金山。繼相能知時務。審政體。又矯之以寬大。一張一弛。均適其宜。是皆古之名相者。其才猷德望。卓可書。而非具臣持位之比云。

阮光潤 嘉林富市人。年二十六一舉熙宗正和二十四年癸未科同進士。改名輝潤。永盛壬子官副都御史。推恩賜爵義川侯。保泰癸卯奉副使如清歲貢。抵燕日與賀部正使范謙益獻詩三章。清帝嘉之。硃批褒獎。丙午使回陞刑部左侍郎。尋遷兵部侍郎。龍德癸丑陞工部尚書。甲寅秋進禮部尚書加少保。命入參從。與阮公案阮貴慤同秉政。景興辛酉命兼督京北時四方多警。戎書旁午。公總統軍民事務。董將士戒官吏。綏民弭盜。預有勳勞。歷陞戶部尚書太子太保。入侍經筵。知國子監。壬戌年六十五致仕。以耆龐命起復。奉侍五老。累進大司空。戊寅年八十一卒。贈大司馬。子輝胤舉解元。年四十一。舉景興戊戌科同進士。仕歷東閣大學士。致仕。孫輝演會元進士。詳見名儒傳。

阮公宋 清池金縷人。解元年三十二登裕宗永盛十年乙未科會元。庭賜同進士。保泰戊申官國子監祭酒。知兵番預中東閣第三。加兼東閣校書。龍德癸丑陞工部左侍郎。再陞刑部右侍郎。以文學爲順王所親用。永祐中官吏部左侍郎慶郡公陪從如故。時順王游佚不聽政。王太弟恩國公深自韜晦。羣小擅權。用事公與知戶番阮貴慤定謀。庚申春翊勸太弟進王位。朝禁爲之肅清。賞功封推忠翊運功臣。命與阮貴慤並入參從。時年五十七。累擢禮部尚書。尋以事出鎮清化。後再入參從。恩王惑杜世佳讒言。復令出鎮山南。未幾加少保。致仕。留東同朝詩有曰。四登虞揆奚謀國。三任周翰曷重邊。蓋謙退之詞。亦見歟。歷陞吏部尚書太子太保。復入參從。時世佳得幸。公素與不合。力求避位。啓云。今海宇向平。天下無難事。臣不稱所任。自覺宜休。王勉從之。年七十五卒。公性清簡方直。有定策大勳。恩王深加倚重。晚爲讒倖所構。不行其志。公論惜之。贈太傅。賜謚忠愍。

卷八 人物誌

動賛之輔

六六

阮貴慤 慈廉天姥人。採花阮貴德之孫。黃甲貴恩之子。以鄉貢預番僚。龍德中擢進朝。仍見授寺卿職知戶番侍太弟恩國公講學。永祐末全王得疾深居宦官治郡公等專弄朝政濁亂。慤密奏太妃旨助太弟行權靖難。太弟辭避不聽。慤遂密與金縷。阮公決定籌策。庚申春因治郡外去。乃籍畿兵充保衛。謀以開寶日舉事。又以事奏知皇上。請賜勅諭。至日扈太弟造朝。金縷公宣諭勅。而慤翊扶太弟登王位。於是頒新令捕逆黨。朝禁爲之肅清。時內外甫平。庶事多所裁整。王令直宿府中。日夕商究政理。公內侍帷幄。外籌軍旅。旬月之間。衆務就緒。解舒鎮定。多有勳勞。尋命入參從。陞兵部尙書。統郡公景興辛酉兼督撫山西。統諸軍事務。時四方多警。朝廷以官爵賞功。優兵有非例。陳乞公却其啓。衆遂相率破其家。思王命查訊其渠者戮之。公由是深自韜晦。托疾辭政。王不允。祿位如舊。復命行吏部事。固辭不許。是年冬。命與尙書武公宰爲招撫使。分行諸道。勸農桑。招流亡。壬戌春引嫌求罷。機務癸亥夏復命入侍參從。累陞戶部尙書。太子太傅。加大司馬。致仕起復。奉侍五老年七十五卒。贈大司徒。暄中公追封福神。

黎有慶 唐豪遼舍人。父有名。登景治庚戌黃甲官至山西憲使。寬慈無競。人以活佛稱之。有男十人。皆能文。三登進士。第六有喜。年二十二。一舉登正和庚辰科同進士。有慶其季子也。慶年十八。同兄謀領鄉解。二十五中宏詞。補內文職。二十八登永盛戊戌科同進士。歷授清化監察。京北署憲察。太原高平諸參閫副都御史等職。年四十七陞承旨。又陞右工充北使使回。陞左工部僚亭伯。庚申入侍陪從。陞都臺。又以軍功陞侯爵。尋奉差留守清化。尋命與何宗勳訪察轄內官吏能否。民情疾苦。及攻禦各道事狀。癸亥召回參從。建言衛兵紀律疎略。請撥給官兵充隊伍。只置武官巡撫。王從之。甲子奉差。

督鎮太原丙寅奉參視又安丁卯奉召回。仍知詞訟。戊辰行禮部尙書已巳再奉參從壬申陞兵部尚書甲戌入侍經筵乙亥年六十五致仕陞禮部尙書御頒彩旗對聯云使旄藩闢勤施日揆席經園勵翼年在朝在郡文兼武于國于家孝做忠渥優國寵恭三命清白家風美四知有慶出將入相四十餘年勳望隆重爲一時能臣庚辰年卒壽七十贈少傅郡公。第六子有容年三十二登乙未科同進士。姪仲信年二十七登戊辰科同進士。

吳廷礦

青威左青威人兄廷碩登正和科同進士奉使仕歷禮部尙書參從永祐末出爲諒山

總撫庚申爲賊所陷卒廷礦年三十六登保泰辛丑科同進士後改廷璽初自翰院出爲清化憲使尋入添差兼副都御史風采隱然庚申間懲毖多方廷礦與親臣定議翊扶恩王卽位朝廷肅清論定策功加宣力功臣歷陞陪從兵部尙書芳亭侯攝樞府典銓曹朝經臺政兩報肅清王心密加簡注嘗以清慎忠勤獎之庚午年六十五乞致仕王重別未許三請方允遂以次年謝歸晚成勳名較兄爲勝當世咸榮美之同朝餞叙略曰公以未衰之年上章致政聖上勉留再三未允而公求去益力不以紛華熱鬧易烟霞松菊之想自非爛熟世途于鄉情宦味中猛然一劃安知倘來之不可戀戀而優游自適於眞閒之外哉錦旋而南去神京里許漢傳之田廬舊子平之婚嫁完銳江之風笛綠野香山諸君子同清致公負此懷抱覩此榮名以此襟懷當此雅趣豈非完于厚德者天必完之以厚報洪鈞大鑄有如是耶尋復起仍陪從卒贈太保銳郡公

何宗勳 安定金城人十五歲中鄉舉年二十八登裕宗保泰五年甲辰科榜眼庭元初官翰林侍書爲山南督同繼出督安廣辦理疆事北人屈服景興初陞戶部左侍郎尋爲西南二道訪察使

乙丑恩王召入內。問以軍國機要條對。時宜稱旨。仍授行參從爵金谿伯。尋改武階。參督職入侍同參從會。清化沿山有警。出爲西道統領。平賊大將軍。戎律齊整。邊塵底清。凱還陞兵部尙書。入正參從兼國子監徽川侯。庚辰年六十五致仕。加陞少保徽郡公。公懷坦蕩。不拘小節。而經綸偉負。左右咸宜。登朝三十餘年。歷仕相職。勳名顯著。尤善作成晚進。門生登第者甚衆。謝事時。多升政府者。東門之會。諸大科趨侍杖屨。文紳盛事。爲中興以後曠觀。同朝賀餞。叙略曰。官爵如黃鐘大呂。人望如喬岳泰山。休休有容。元老而推晚輩。穆穆旁作。不時以讓後人。以大儒居首相。旱霖金礪責望方殷。乃介石先幾。急流勇退。移慨然自任之志。而還囂囂自得之身。進退從容。其欣適爲何如。抑聞之。愛州龍興之地。一泉一石。莫非名勝。而玉槌之水。銅鼓之山。又貴縣林壑之眉目。山環之畔。姜賢相之故閭。東里之濱。鄭大魁之勝地。古人遺蹟。往往在焉。公還矣。杖屨春風。琴樽秋月。觀奇選勝。於焉逍遙。文潞公耆英之會。裴晉公綠野之堂。均是一般韻事。卽其怡閒樂壽容。有限量者哉。公旣歸築亭江津。每良時勝景。輒來亭上賞酌。時招野叟談話。風韻瀟洒。初若無廊廟之貴者。未幾尋命起復。奉侍五老。卒贈太傅。

阮德暉。仙遊佛跡人。父德暎。登永盛乙未科同進士。仕歷刑部侍郎。致仕。德暉初舉鄉解元。年二十八。登裕宗保泰丁未科同進士。永祐內長官東閣校書。以告効功。擢刑部右侍郎。再遷兵部右侍郎。與父同列三品。時年三十七。以文學爲順王所親任。己未進吏部右侍郎。景德初。歷進陪從工部尙書。行吏部事。兼國子監祭酒。入侍經筵。義方侯。時邊方騷動。朝廷宵旰。德暉與有慶貴慤趨陪政府。同心規畫。深爲恩王眷注。爲人清慎蒞臺十八年。家無餘積。人服其廉。王心亦密簡焉。甲申年

六十四。致仕。加少保。御制唐律賜錢。曰。十分清廉之旗。尋起復。陞兵部尙書。仍行吏部事。累加太子太傅。乙未年七十六卒。贈太保。子的年四十三登景興丙戌科同進士。仕至京北督同。姪晟年三十三登景興丙戌科同進士。仕至宣光督同。

阮 儼。字希思。號毅軒。宜春仙田人。年二十四。登永慶三年辛亥科二甲進士。初陟朝班。歷參戎督。協同贊理。累奏膚功。景興辛酉年三十四。以奉策勳陞山南參政。尋改國子監祭酒。癸亥年陞翰林承旨。爵春嶺伯。丙寅年以軍功陞工部右侍郎侯爵。特准陪從坐堂。戊辰年以乂安有警。命爲宣撫使。兼贊理軍務。管鎮內奇與參領勵郡公會勦僞黨。賊平回朝。陞刑侍。尋以清化山寇肆出。命爲協鎮守。進攻賊壘。所至克捷。會賊間道侵鎮。所留守官敗走。公始提兵回援。收復鎮營。庚午春。廷議以清化失守。降授東閣大學士。是冬恩王西征。命爲贊理扈駕。進平僞策。以功陞僉都御史。壬申春。奉往西興四道討賊。隨卽凱還。准復前降職。癸酉年以平賊功陞副都御史。時年四十六。是冬。命爲清化道督鎮平賊將軍。管右翊奇率諸號官軍。進攻山賊。分兵並起。進入哀牢國界。賊途遠竄。旨下班師。甲戌春回朝。是夏。命爲會圍左監試。乙亥夏。命爲乂安協鎮。次年召回。尋命協與兼統領域。郡公進討京北山寇。擒之。丁丑冬。陞刑部左侍郎。辛巳夏。准討山寇功。陞都御史。再陞工部尙書。特領入侍參從。時年五十四。既入相。始解兵符。易管侍候嚴右隊。尋命知國子監。知中書監。兼知東閣國史總裁。甲申夏。進秩少傅。丁亥。盛王攝政。陞太子太保。進爵春郡公。歷加大司空。辛卯冬。年六十四。乞謝陞大司徒。特賜以其年致仕。仍准以榮旋。三月起復。宅揆遷戶部尙書。甲午南征。頒左將軍順化道參贊軍機管中捷軍營。尋卒。時年六十八。公有文武略。以少雋及第。歷三朝。周旋臺署。出入將相。居首輔十五年。糾紛雍容。酬應如一。恩王嘗以德望才智獎之。爲國元老。爲朝廷柱石。勳望隆

卷八 人物誌

勳賢之輔

七十

重當世推稱。賜謚忠勤。追封中等福神。

子阮侃。景興庚辰科同進士。仕至吏部尚書參從郡公爵。丙午兵亂。避源頭得瘴病回京卒。

陳名寧。嘉平寶篆人。父附翼。正和癸亥科同進士。仕歷諒山參政。有男十人。公其第八子也。少時性最嗜學。用功勤苦。既長。遂以文章名。年二十一。領鄉解元。二十九歲。登永慶辛亥科黃甲。自鄉舉至廷試。皆第一。景興庚申官翰林院侍講。命入陪從。逾年賜爵寶暉伯。癸亥年推恩陞國子祭酒。尋以事停陪從。未幾准扈駕南征功。陞東閣大學士。次年奉進贊理東道勦除草寇。召回。仍准入侍陪從。奉行樞密事務。乙丑冬。以軍功陞僉都御史。時年四十三。明年准頒在堂。陞工部右侍郎。丁卯春准侯爵。趨陪日久。練熟典故。五次條陳。稱旨。特奉褒獎。擢吏部右侍郎。陪從如故。時東南草寇猖獗。特差爲贊理。協與兼統領勤郡公進兵討之。大致克捷。東南稍安。預賞功陞副都御史。庚申冬奉扈侍西征。次年賊平。推恩陞工部左侍郎。在政府凡十六年。守正不阿。爲權倖所疾。丙子坐停陪從。貶一次。戊寅推恩再陞工部坐堂。庚辰冬奉准復陪從。次年復准行禮侍。又准還駐職。遷刑部右侍郎。兼史館總裁。再奉賞破賊功。陞禮部左侍郎。丙戌年六十四。援例請致仕。陞禮部尚書。丁亥春及還鄉。卒。爲人剛厲。嚴毅自持。風裁甲兵。篤厚咸宜。至其處廊廟。斷政論。慷慨公直。凜然有不可犯。名臣矩度。爲時所推服云。贈少保。賜謚敏達。第十四子光宅。生而聰穎殊常。十歲撰御祭。奉賞年十三。領內學。十五歲。與北使唱和。人皆以狀元呼之。

陳名祿。號謙齋。名寧之同母弟。附翼第九子也。年二十一。與兄同領鄉解。二十七歲。並登永慶辛亥科同進士。昆弟聯榜。時人榮之。景興初。官高平督同。以平賊功。陞翰林校理。賜爵油岳伯。尋命爲督鎮。乙丑年將兵收復諒城。錄功陞僉都御史。進侯爵。丙寅召遷陞工部右侍郎。奉監軍西道。以

功遷刑侍。丁卯夏，准差又安督視。戊辰以功陞兵侍，在鎮十三年。恩威兼著。朝廷倚重。己卯年召還。擢吏部右侍。入侍陪從。兼副都御史。丁亥推恩陞工部左侍郎。兼御史臺行都御史。己丑年援例致仕。陞工部尙書。加陞刑部尙書。登仕三十九年。蒞朔南兩閩。凡六考。陪揆席又六期。在郡在朝。名望煥曠。丙申年以耆舊特命起復。行吏部事。尋卒。壽七十三。性清廉和易。與物無競。所至民多懷惠。入陪政府。蒞烏臺典銓部。世以秉心公正推之。與兄寶暉公同時登用。內朝外郡。並以政績顯名。皆秩尙書致仕。尤爲一家之完福云。贈少保。賜謚忠亮。長子名榮舉鄉元。年三十三。登昭統丁未科黃甲。鼎革後不仕。尋卒于家。

阮伯璘先豐古都人。祖貫仙遊。懷抱三代祖邃於地學。愛古都風水。始徙居之。父公完以文章名世。伯璘學業得自家素。年三十三。登永慶辛亥科會元。進士始任番僚。以清慎知名。景興初。爲左執法。公平不阿。恩王深加眷注。時值四方多故。以名臣勲望。出當邊閫。甲子爲興化留守。繼爲高平督鎮。撫蠻戢盜。累著功績。尋入爲僉都御史。陪從爵醴澤侯。抗忠論事。不爲回護。王以正直敢言。獎之。歷陞工部尙書。丙戌年六十五致仕。尋起復。兼知詞訟諸事。丁亥靖王親政。以災旱求言。伯璘上疏。請伸屈抑。寬連坐。拯流移。蠲積乏。加租。王嘉納之。尋又上言興化事勢。又陳滅賊之策。請專制沱江一道。不出二年。竇賊之頭可致闕下。王壯而遣之。許管左銳奇爲興化道宣撫使。未幾以衰老辭任。庚寅引疾乞回。王諭之曰。卿雖老。膂力猶可任事。且得人任職最難。方擇可以代卿者。卿在官多有浮言。我不爲惑。今雖辭任。可留京以備顧問。論平寧居守功。進陞禮部尙書。累遷戶部尙書少保。奉侍五老。乙巳年卒。壽八十六。贈太宰郡公。

汝廷瓊 唐安穫澤人。祖進用。登景治甲辰科同進士官至給事中。父進賢。登永治科進士。奉使歷仕刑部尙書。陪從斷獄平允。以政事稱。時人誦之。永佑末卒。景興初加贈少傅。壽郡公。制辭略曰。入御史以參臺。霜凝素簡。進尙書而貳相。時著訏謨。勳業于信史有徵。知遇在先朝無替。位於才而未備。梅正希傳鼎之調。祿與福以均留。槐若侍王。盧之鬱果鐘令嗣。寔幹洪樞。又云喬木紹芳。三歷世而風聲交煊。公能兼作述於一身。甘棠留蔭百餘年。而政績如新。朕尙記誦謠于萬口。蓋深追美之也。廷瓊少而英俊。學問機杼。得之家庭。年十八。以文章獲咎。遂以此名天下。二十六始得就試。中鄉試第二。蔭授寺丞。年三十三。登懿宗永祐丙辰會元進士。景興初。以寺卿行參從。時國家多故。廷瓊以新進。與二三故老。同理庶務。恩王最加寵遇。御改名公。瓊王戊命。探訪山南下路。尋命召入內。委以軍國機務。瓊與宗勳條陳時宜。甚稱王意。累陞兵部尙書。參從播澤侯。左右彌綸。日承眷注。辛未校定百官職掌。廷瓊參酌先朝典例。以九條訓迪政府。號稱令典。又以近代文尙繁碎。寔少渾淳。請於王旨。諭遵洪德文體。鄉會試題。並用平易。革細碎。於是場屋章句之習。爲之一變。識者稱之。當揆十餘年。務持體統。尙寬大。號稱名臣。後因欲遠權勢。遂乞改除武職。授校點權府事。累遷至左都督忠派侯。致仕。特賜國老。尋命起復。固辭。王賜國音詩以諭之。終不肯起。癸巳年卒。壽七十二。贈太保。第四子公頃。年二十二。登壬辰科黃甲。會庭

並第二。爲本科少雋。仕至署禮部左侍郎。

范廷重 峽山輕徭人生。而丰姿魁碩。年八歲啓蒙。卽貫詩律。及長文章雄偉。年二十六。一舉登永祐己未科同進士。景興初。官副都御史。入侍陪從。爵璫嶺侯。尋命爲東南北三道協鎮。領諸軍。尉

有求重既奉命率本道兵與荆門七郡及清河四岐永賴諸義士累立戰功乙丑大破有求于昌江獲其黨羽求勢孤乞降于朝恩王命僉知阮爽等緩攻重曰將在外君命有所不受我奉命滅賊就使勢有可乘亦不以君故逗留也爽等相顧失色往與求述王旨言未訖重卽提兵掩至襲擊大敗之求遁去戊辰又敗求兵于昌江己巳董道兵會勦求奔乂安庚午重屬將范廷仕獲求于瓊瑤檻送京師積年逋寇一旦掃除時重年三十六以功陞兵部尙書太子太保海郡公制曰具官某碩礎宏材星岩間氣假文章於大塊早馳科甲之名徵器業於小官夙負公侯之望頃屬經綸之際茂攢幹敏之猷海漠參共服之權調撥獨勞於三閩雲山虜干常之醜經營較逸於一籌附威之教雙行攘伐之兵百克戈船破浪塗山驚鴻鳥以焚巢鐵騎橫空昌河截奔鯨於觸網邇列暫陪清禁遐藩仍備良翰從政府以操戈四方仰袞衣繡裳之化出黃堂而蒞武三軍壯葱珩金路之容寔虛洞照先機戰守善承定勢晦干戈於耒耜耕屯散敵迄定攘夷化刀劍而絃歌垣堵流民轉成定集國有能兵之將人稱常勝之家義聲到處坦平劇務隨方料理平海一施妙畫東洋消反側之奸觀瀾七獻頑俘燕臺壯擒防之烈朝奏二梁之凱邊興一范之謠動動靜兼常武山川鞅掌嗣采薇日月四征訖懸崖飛瀑踐履躬弁胄之所難十稔經用武休戈雍容以帶裘而覺易雅繼匡周之績堪循策晉之儀朕祇紹先猷仰成至理賴王上重敷貢政永底定功保治之休嘉元臣久服師勞不負說禮敦詩之選酬獎允諧於僉議眷優寔簡於朕心是用晉陟正卿榮加列郡予以昭厚遇予以表殊勞於戲帳氈樽俎莫非功旣重師中之錫廊廟封疆皆報國勉堅王室之心王以南陲保障權任係隆

卷九

人物誌

勳賢之輔

七四

命爲又安督率。旣蒞政。威聲素著。盜賊消弭。境內帖然安治。土人爲之立生祠。甲戌卒于軍營。年四十。公以文武全才。爲王國元臣。儒流名將。勳業之奇。近代所未有云。進封大王福神。沒後驩人立廟祀之。

祠在清化縣乾山鄉。

按景興庚申辛酉年間。四方擾動。朝廷宵旰。恩王勵精圖回。振拔淹滯。當時二三故老。與衆賢之繼進者。相與同心同力。翼贊修攘。或籌畫於廟堂。或馳驅于邊閫。使十年之餘寇賊寧清。海宇安治。諸臣勳烈。蓋均可稱爲黎晚之賢輔者。今特錄自阮富市公以下至范輕徭公。凡十三人。皆有顯績可紀。次第登載。而其餘則不復贅錄云。